


Il SuperDizionari de lenghe furlane al è super ancje tes visitis

PLUI DI 15.000 AL MÊS. GRATIS E INTUITÎF, LU SI CJATE SU WWW.ARLEF.IT

Al basta dome un click par cjatâ intun moment la peraule furlane corete o cognossi i riferiments storics dal propri cognon. Cemût? Midiant dal SuperDizionari de lenghe furlane. Di fat, cuntune interface uniche e semplice al permet di acedi ai contignûts e ai risultâts di trê risorsis digjitâls preziosis dedicadis al furlan: il il Grant Dizionari Bilengâl Talian-Furlan; il Dizionari de Lenghe Furlane (Monolengâl) e il Dizionari dai Cognons. L'ultin, in particolar, al è une vere enciclopedie dai cognons dal Friûl cun dentri nons, riferiments storics, sclariments etimologjics, studis gjeografics e altris informazions e curiositâts. Che al sedi un imprest "Super" preseât lu conferme ancje la medie di 15.000 visitis al mês, e ancje il timp medi di visite, di plui di 5 minûts. E al è "Super" ancje par cetancj altris aspjets: parcè che al è stât pensât cun criteris che a facilitin la leture, la consultazion e l'ûs sul computer e sul smartphone; al è gratis, al è acessibil a ducj, students, insegnants, ricercjadôrs, tradutôrs, ma ancje citadins comuns e apassionâts de lenghe. Il grup di esperts che al à lavorât al so svilup al à rivât a rindi la navigazion intuitive e imediade ancje se la plateforme e à di gjesti une cuantitât di dâts une vore impuartante. Si fevele di



70.000 vôs talianis e plui di 68.000 vôs furlanis tal Dizionari Bilengâl: 7.000 lemis, 37.000 acezions e 51.000 frasis ta chel Monolengâl, plui di 8.000 cognons cun sclariments etimologjics e storics tal Dizionari dai Cognons. Il SuperDizionari de lenghe furlane al è un progjet realizât de ARLeF - Agenzie regionâl pe lenghe furlane, in atuazion dal Plan gjenerâl di politiche linguistiche pal furlan de Regjon Autonome Friûl-Vignesie Julie. Lis trê risorsis che a componin il SuperDizionari a son stadis otimizadis e razionalizadis. Il risultât al è un ecosisteme moderni che al contribuìs a valorizâ e slargjâ l'ûs dal furlan, cun chê di proietâl tal futûr digjitâl.

Lis trê risorsis digjitâls in struc

Il Grant Dizionari Bilengâl Talian - Furlan al è une vore complet par lemis e profunditât descriptive, cun definizions, esemplis e une fraseologjie cetant siore, tal respìet de grafie uficiâl. Pal talian, si fonde sul "Grande Dizionario dell'Uso della Lingua Italiana" di Tullio De Mauro; pal furlan, al fâs riferiment a dutis lis oparis lessicografichis furlanis publicadis e ai criteris di insiorament dal lessic e di formazion dai neologjisms. Al à dentri plui di 70.000 lemis de bande dal talian (monorematichis e polirematichis), riferîts a passe 68.000 lemis furlanis. La part informatiche e je stade realizade di Ensoul, chê linguistiche di CFL

2000 e CLAAP Centri di linguistiche aplicade "Agnul Pitane", cu la poie finanziarie de Regjon Autonome F-VJ e de ARLeF.

Il Dizionari de Lenghe Furlane (Monolengâl) al descrif in maniere analitiche lis acezions e al ufris cetancj esemplis che a rivin soledut de produzion scrite in lenghe furlane. Dentri a son plui di 7.000 lemis e passe 4.400 locuzions e espressions polirematichis. Lis acezions totâls a son cirche 37.000, e lis frasis di esempli a passin i 51.000 câs. La part informatiche e je stade realizade di Ensoul, chê linguistiche dal CLAAP Centri di linguistiche aplicade

"Agnul Pitane", cu la poie finanziarie de ARLeF.

Il Dizionari dai cognons al è la version digjitâl, curade di Ensoul, de publicazion "I cognomi del Friuli" di E. Costantini e G. Fantini publicât di La Bassa/LithoStampa intal 2011, un volum che al à dentri plui di 8.000 cognons presints in Friûl. Al è une vere enciclopedie dai cognons cun nons, riferiments storics, sclariments etimologjics, studis gjeografics e altris informazions e curiositâts. La aree tocjade dal studi e cjape dentri dut il teritori dai Comuns di lenghe furlane, e no dome, che a son intes ex provinciis di Gurize, Pordenon e Udin, e ancje il mandament di Puart, in provincie di Vignesie.